

Katapusan na ba ang Kamatayon?

Ang kamatayon maoy usa ka dili kalikayang umaabot nga gikalisangan ug gikaintapan ni bisan kinsa. Apan usa ka kamatuoran nga moabot gayod - pobre ka man o adunahan. Ang kahadlok nagagikan seguro sa kawala'y hingpit nga kasayuran kon unsa gayod ang kamatuoran sa kamatayon.

Busa dili kalikayan nga magbaton kita'g kahadlok bisan gani sa paghuna-huna lamang niini. Wala kita'y ideya unsay nagpaabot kon atubangon na nato ang utlanan sa kinabuhi.

Bisan gani ang mga namlimbasog nga magpakabuotan aron mahalangit kay lagi mas mahimayaon kuno ang ilang kahimtang didto human sa ilang paglawig niining kinabuhia wala gihapo'y intensyon nga mamatay.

Kataw-anan hunahunaon, apan dili komedya ang usa ka butang nga angayan gayod usisahon kay mahinungdanon kining kabahin sa atong pagkatawo. Unsa man ang kamatuoran sa kamatayon? Ang siyensya, teknolohiya ug mga taas nga institusyon sa kaalam aduna kaha'y ikahatag nga katin-awan sa maong hilisgutan? Ang relihiyon kaha aduna ba'y mga tataw nga pahayag nga nagagikan sa kasaligang tuburan? Kon wala, magmalinawon na lang ba kitang itugyan sa misteryo ang tanan?

Kong nanlimbasog kita aron magmalamposon, apan sa kinatumyan niining tanan kamatayon lang gihapon ang padulngan, dili kaha mas mahinungdanon nga tukibon nato kon unsa gayod ang kahulogan sa kamatayon? Seguro angayan lang nga dili kita magkarapkarap sa kangitngit mahitungod niining butanga.

Aduna'y tuburan sa kamatuoran mahitungod sa kinabuhi ug kamatayon. Wala'y lain kon dili ang talamdan nga nagagikan sa nagmugna sa tawo, (Gen.1:26) ang Biblia.

Dinhi atong makita ang tin-aw nga pahayag sa Dios kon unsa'y mahitabo human sa atong paglawig niining kinabuhia. Dinhi atong makita ang tin-aw nga pahayag ngano nga gipakatawo kita, ug unsay naghulat kanato human mapapas kining kinabuhia.

Ang Sambog sa Tawo

Usa' nato hatagan ug tubag ang mga nahaunang pangutana, atong usang sutaon kon unsa ang sambog sa tawo. Kong diin magagikan ang iyang kinabuhi – kon aduna ba siya'y kalag nga mobulag sa iyang patayng lawas inigkamatay na niini.

Ang Genesis 2:7 nagaingon: “Unya mikuha ang Ginoong Dios ug yuta ug nagbuhat Siya'g tawo gikan niini; gihuypan Niya ang buho sa ilong sa tawo sa makapabuhing gininhawa ug ang tawo nahimong buhing kalag.”

Sayon sabton ang versiculo. Sa dihang giumol pa sa Dios ang yuta aron pormahon nga tawo, wala kini kinabuhi. Usa kini ka patayng kalag sa wala pa huypi sa Ginoong ang iyang mga ilong. Nagbaton lang kini'g kinabuhi sa dihang gihuypan na sa Dios ang mga buho sa iyang ilong, ug diha-diha nahimo siyang *buhing kalag*.

Ang kalag diay sa sinugdanan walay kinabuhi. Ang pulong nga *kalag* hinubad gikan sa pinulongang ingles nga soul nga nagagikan usab sa orihinal nga pinulongan nga hebromanon nga *nephesh*. Ang buot ipasabot sa *nephesh* mga binuhat nga may ginhawa maingon sa mga mananap – breathing creature sa ingles. (Genesis 1:21;24; 2:19; 9:10,12; Leviticus 11:46)

Ang Kalag May Kamatayon

Ang mga misunod nga mga versiculo nagpamatuod nga dili “*immortal*” o walay kamatayon ang kalag: Ezekiel 18:4, Ang Dios miingon, “ang tanang kalag akoa, ang kalag sa amahan ingon usab ang kalag sa anak akoa.; angkalag nga makasala mamatay.” Dugang pa: “Ang kalag nga nakasala mao ra'y mamatay.”

V-20. Anaa ang pulong sa Dios nga nagpamatuod nga ang kalag may kamatayon. Ang kalag o binuhat nga giumol gikan sa yuta nakabaton lang ug kinabuhi human huypi sa Dios ang mga ilong niini. Dugang pa, sa dihang gipapahawa na sa Dios si Adan ug Eba sa tanaman sa Eden gumikan sa ilang pagsupak sa sugo sa Dios nga dili angayan nilang kan-on ang bunga sa kahoy nga naghatag sa kahibalo ug unsay maayo ug unsay daotan (Gen. 2:16-17), mao kini gisulti sa Dios kang Adan: “Magpatulo ka sa singot ug maghago pag-ayo una pa mohatag kanimog abot ang yuta hangtod nga mobalik ka sa yuta nga gigikanan mo. Hinimo ka gikan sa yuta, ug sa yuta ka mopauli.” (Genesis 3:19)

Si haring Solomon nga inilang pinaka-adunahan ug pikamaalam nagpahayag: “Nagtuwo ako nga gisulayan sa Dios ang tawo aron pagpaila kanila nga sama ra sila sa mga mananap, kay mangsamag dangatan ang mga tawo ug mananap – mangamatay silang tanan. Managsama silag kinabuhi. Sama ra sa mananap ang tawo. Managsama ang ilang padulngan – abog. Gikan sila sa abog, ug sa abog sila mopauli.” (Ecclesiastes 3:18-20)

Dili malikayan nga adunay mga tawo nga nagmahitas-on ug may pagka-garboso sa panahon nga sila makasandig sa mga inilang haligi o mga kadagkoan sa katilingban.

Ang Ginoo nagpahinumdom nga bisan unsa pa ka gamhanan ang usa ka tawo niining kalibotana dili siya molungtad. Dunay utlanan ang tanan. Hinunoo:

“Ayaw saligi ang mga tawo bisag pangulo sila, ni saligan mo ang dili makaluwas kanimo. Mopauli sila sa yuta inigkamatay nila; nianang adlaw matapos ang tanan nilang mga laraw.” (Salmo 146: 3-4)

Ang Naandang Pagtoo

Matud pa sa tradisyonal nga pagtoo, tulo kuno ka dapit ang padulngan sa mga namatay. Gidawat na sa kadaghanan sa walay pupangutana ang maong gipanudlo sukad pa sa pagkabata. Talagsaon ra ang adunay maduki-dukiong pangusisa kon unsa ba gayod ka tinuod ang naandan nang gituohan.

Una kuno, kong siya nagmatarong sa iyang pagkatawo mintras buhi pa, sa langit ang iyang kapadulngan. Apan kon daotan ang iyang binuhatan seguradong sa impyerno siya moderitso. Ug kon dili tanto ang iyang pagkadaotan, sa purgatoryo una siya idestino, ug hatagan pa siya'g higayon nga mahalangit pinaagi sa mga pag-ampo sa mga nahabilin pa nga mga kabanay sa kalibotan.

Unsa ba kini ka tinuod? Ang bibliya may gisugyot:

“Sutaa ninyo ang tanan; ampingi ang maayo, ug isalikway ang daotan.” (1 Tesalonica 5:21-22) Busa, angay lang estudyohan ang mga pulong sa Dios ilabi na ang tema sa kamatayon.

Mosaka ba sa langit ang mga buotan inigkamatay?

Napamatud-an na nato pinaagi sa mga naunang pahayag nga ang kalag adunay kamatayon. Ang tawo mintras buhi pa usa siya ka buhing kalag. Busa kon naputlan na siyag ginhawa ug ang tanang bahin sa iyang lawas wala na maglihok, usa na siya ka patayng kalag. Wala na siya'y nahibaloan sa mga panghitabo sa iyang kasilinganan. (Ecclesiastes 9:5)

Ang pangutana, unsa ba gayod ka tinuod ang gilaoman sa kadaghanan nga mosaka ang ilang kalag sa langit sa sa oras nga sila mamatay? Unsay pulong Bibliya? Matud pa sa Dios, “Nakita ko nga si David, anak ni Isai, nakapahimuot kanako, ug magbuhat sa tanan nga isugo ko kaniya.” (Buhat 13:22)

Kon aduna may mga tawo nga nahilangit human siya mamatay, si haring David seguradong usa na niini. Apan may giwale si Apostol Pedro: “Mga igsoon, kinahanglan isulti ko kaninyo sa matin-aw ang mahitungod kang David nga atong patriyarka.

Namatay siya ug gilubong, ug ang iyang lubnganan ania pa dinhi hangtod karon.” (Buhat 2:29)

Angayan natong masayran nga dul-an na sa duha ka libo ka tuig ang nanglabay sukad namatay si David usa' pa magwale si Pedro. Si Cristo mismo nagaingon: “Wala pay nakasaka sa langit gawas niadtong nanaog gikan sa langit – ang Anak sa Tawo” (Juan 3:13)

Klaro nga gihisgotan ni Jesus ang iya lamang kaugalingon ug walay lain. Ang uban kahang mga masunoran ug gikahimut-an sa Dios? Sila Abel, Enoch, Noah, Abraham, Isaac, Jacob, Moses, Barak, Samson, Rahab, ug uban pang personalidad nga napamatud-ang masunuron ug nagmatinud-anon sa ilang pagtuwo sa Dios, hain naman? Atua na kaha sa langit?

Ang giilang capitulo sa pagtuwo makahatag kanatog kasinatian sa ilang kahimtang, ang Hebreo 11. Silang tanan gikahimut-an sa ilang walay paglubad nga pagsalig ug pagtuwo sa Dios. Wala sila kabsi'g paglaom sa paghulat sa mga saad sa Dios. Nagmatinuoran ug masaligon silang naglantaw hangtod sa ulahing mga gutlo sa ilang kinabuhi sa tanang mga gisaad sa Ginoo. Asa na man sila karon?

Ang mga versiculong mosunod naghatag ug katin-aw kon hain ug unsa na ang ilang mga kahimtang: “Nangamatay silang tanan diha sa pagtuwo. Wala sila makadawat sa mga butang nga gisaad sa Dios, apan bisan layo pa kaayo nakita na nila kini ug gikahinangop nila ug miila sa dayag nga sila mga langyaw ug dumuduong dinhi kalibotan.

Kadtong nagsulti sa ingon nagpahayag sa matin-aw nga nangita sila ug usa ka nasod nga ilang kaugalingon. Wala na sila maghunahuna sa nasod nga ilang gibiyahan; kon naghunahuna pa sila niini, makapauli unta sila. Hinunua, gipangandoy nila ang labi pang maayong nasod, ang langitnong nasod. Busa wala ikaulaw sa Dios nga sila moila kaniya nga ilang Dios, kay nag-andam man Siyag usa ka siudad alang kanila.” Hebreo 11:13-16.

Ang kalainan sa tawo ug mananap

Atong nakita sa mga naunang mga pa-hayag nga ang tawo ug mananap walay kalainan. Pareho ang ilang dangatan. Gikan sila sa abog, ug sa abog sila mopauli, Ecclesiastes 3:19. Kon kutob ra diay niana ang atong dangatan, unsa pa man diay pulos sa kinabuhi? Dakong pangutana nga angayan gayod sutaon kon unsa ang kamatuoran. Kon diha lang kutob ang kinabuhi, dakong kabalaka ang idulot niini.

Apan, dako ang kalainan sa tawo kumpara sa mga hayop. Ang hayop wala saari sa Dios sa usa ka mahinungdanong butang – *ang pagkabanhaw gikan sa mga patay*. Tawo lang ang iyang gihatagan ug higayon nga mabuhi pag-usab gikan sa kamatayon.

Matud ni Jesus: “Ayaw kamo kahibulong niini, kay moabot ang panahon nga makadungog sa Iyang tingog ang mga patay nga anaa sa lubnganan ug manggula sila sa ilang lubong; kadtong maayog binuhatan mabanhaw ug mabuhi, ug kadtong daotan ug binuhatan mabanhaw aron silotan.” (Juan 5: 28-29)

Ang mga binuhat nga ubos ug matang sa tawo sama sa mga mananap walay tulubagon sa ilang mga binuhatan. Wala sa ilang kinaiya nga makabaton ug kaalam kon unsay matarong ug daotan. Tawo lang ang adunay katakos mamili kon siya magpakamatarong o dili ba kaha magpakadaotan.

Niini atong makita nga ang gihisgotan ni Jesus nga pagkabanhaw gitagana lamang alang sa katawhan nga gilalik nga kamay-ong ug sama sa panagway sa Dios (Genesis 1:26).

Ang Pagtulog ug ang Kamatayon

Ang kamatayon gitandi lamang ni Hesus sa pagtulog.

Sa dihang gibanhaw ni Jesus ang iyang higalang si Lazaro gikan sa kamatayon, ang Iyang pinulongan nagsugyot nga ang kamatayon ug pagkatulog walay kalainan. Bisitahon nato ang nahitabo: “May usa ka tawong nasakit nga ginganlag Lazaro nga taga Betania... Busa ang magsoon nga si Maria ug si Marta nagpadalag balita kang Jesus nga nasakit si Lazaro, ang suod niyang higala. Sa pagkabalita ni Jesus niini, miingon siya, “Dili siya mamatay niining sakita; mahitabo kini aron kapasidunggan ang Dios, ug pinaagi niini kapasidunggan usab ang Anak sa Dios.”

Suod si Jesus ni Marta ni Maria ug ni Lazaro. Sa pagkabalita niya nga nasakit si Lazaro, nagpabilin siya'g duha pa ka adlaw niadtong dapita... Si Jesus miingon; Ang atong higalang si Lazaro natulog, apan moadto ako aron pagpukaw kaniya.” Ang mga tinun-an mitubag, “Kon natulog lamang siya Ginoo, mamaayo siya.” Apan ang buot ipasabot ni Jesus mao nga si Lazaro namatay na; naghuna-huna sila nga naghigot siya ug pagkatulog lamang.

Busa gisultihan sila ni Jesus sa walay lipod-lipod, “Namatay si Lazaro, apan tungod kaninyo nalipay ako nga wala ako didto uban kaniya aron motuo kamo. Adtoon ta siya.” Sa pag-abot ni Jesus nasayran niya nga si Lazaro upat na ka adlaw didto sa lubnganan.

Si Marta miingon kang Jesus, 'Kon dinhi ka pa lamang, Ginoo, dili unta mamatay ang akongigsoon! Hinuon, nasayod ako nga bisan karon mohatag ang Dios kanimo bisag unsay imong pangayoon. Si Jesus miingon kaniya; Mabanhaw ang imong igsoon.” (Juan 11: 1,4-6,11-15,21-23.)

Kon duna kamo'y panahon basaha na lang ang kinatibuk-ang istorya. Ang importante lamang natong mapa-matud-an pinaagi sa mga naasoyng mga versiculo mao nga ang PAGTULOG ug KAMATAYON wala hatagig kalainan sa panan-aw ni Jesus. Usa lang ang deperensya – sa pagtulog dunay higayon nga magdamgo ug dili ba kaha damanon ka. Apan ang pagtulog ug pagkamatay pareho lang – wala kana'y mahibaloan sa mga nahitabo sa imong kasilinganan. Dili ka makaamgo o makamatikod sa mga butang nga nagaliyok kanimo. 100% nga wala ka na'y kalibutan sa bisan unsa pa nga mga kalihokan.

Kumpirmado kini ni Haring Solomon: “Ang mga buhi nasayod nga mangamatay sila, apan ang mga patay wala nay mahibaloan bisan unsa.” Ecclesiastes 9:5). Unsa naman diay ang atong hulaton pa?

Si Jesus adunay gibuhiang mga pulong nga makahatag ug kadasig sa mga namatayan. Atong balikon ang mga nahitabo kang Lazaro. Si Jesus nagaingon kang Marta, “*Si Marta mitubag; “Nahibalo ako nga mabanhaw siya sa kataposang mga adlaw.”* (Juan 11:23-24)

Ang pagkabanhaw nga gilaoman ug gihulat usab ni Marta sa ulahing mga adlaw mao usab kini ang gisulti ni Jesus sa Juan 5:28-29 nga ato nang gipahayag sa ika-13 nga pahina niining basahona.

Puno ang mga panid sa Biblia sa mga pagpahibalo nga adunay umaabot nga pagkabanhaw sa katawhan. Si Apostol Pablo nga usa sa mga gihatagan ug dakong tahas gikan sa Dios aron magsangyaw sa maayong balita mahitungod sa pagkabanhaw nagasulti sa atubangan sa mga kadagkoan sa Labawng Hukmanan: “*Mga igsoon, ako Pariseo ug anak pa gayod sa usa ka Pariseo. Gipaatabang ako dinhi tungod kay nagtuo ako nga banhawon ang mga patay.*” (Buhat 23:6)

Gigahinan usab kini niya'g usa ka capitulo sa Biblia aron tin-aw nga maipahayag ang pagkabanhaw gikan sa mga patay. Ania ang pipila sa mga tipik-tipik nga gikutlo gikan sa iyang sulat ngadto sa mga kristiano sa Corinto: Sa dihang gibanhaw ni Jesus ang iyang higalang si Lazaro gikan sa kamatayon, ang Iyang Ug labaw pa niana, makita nga namakak kami sa Dios kay nag-ingon man kami nga gibanhaw niya si Cristo – apan wala diay banhawa sa Dios kon ugaling matuod man nga ang mga patay dili banhawon. Ug kon dili banhawon ang mga patay, wala usab banhawa si Cristo.

Ug kon wala banhawa si Cristo kawang lamang ang inyong pagtuo ug makasasala gihapon kamo. Nagpasabot usab kini nga mangalaglag ang mga nagtuo kang Cristo nga nangamatay na. Kon ang atong paglaom kang Cristo ania ra niining kinabuhia, nan kita ang makaluluoy sa tanang mga tawo. Apan ang tinuod mao nga gibanhaw si Cristo, ingon nga pasalig nga kadtong nangamatay banhawon usab.

Kay ingon nga miabot ang kamatayon pinaagi sa usa ka tawo, moabot usab ang pagkabanhaw pinaagi sa usa ka tawo. Kay ingon nga nangamatay tanang mga tawo sa ilang pagkahiusa kang Adan, banhawon usab ang tanan tungod sa ilang pagkahiusa kang Cristo. Apan ang matag usa anaa sa iyang hustong dapit: si Cristo maoy una sa tanan, unya mosunod kadtong iya ni Cristo inig-abot niya.” (1 Corinto 15:12-23)

Busa ang kamatayon dili ikaingon nga katapusan na sa usa ka tawo. Aduna'y iya-iyang panahon ang pagbanhaw sa katawhan. Kanus-a ug kinsa man ang mga banhawon sumala sa plano sa Dios? Tinuod ba nga

Ang Tulo ka Pagkabanhaw

Motuo ka'g dili, tulo ka pagkabanhaw ang gihisgotan sa Biblia. Atong usa-usahon kini. Kon atong balikan ang gisulti ni Pablo, matud niya: “Apan ang matag usa anaa sa iyang hustong panahon, si Cristo una sa tanan, unya mosunod kadtong IYA NI CRISTO inig-abot Niya.” (1 Corinto 15:23)

Anaa ang unang kategorya sa mga banhawon sa ikaduhang pagbalik ni Cristo – KADTONG IYA NI CRISTO. Kinsa man kini sila? Sila mao ang mga tawo nga nakadungog sa mensahe gikan sa mga sulugoon sa Dios unya mituo kang Cristo, naghinulsol sa ilang mga sala ug nagpabautismo sumala sa paagi nga gilatud sa Biblia. Mao kini ang unang lakang sa usa ka matuod nga Kristiano.

Ato kining masaksihan sa mga naunang kristianos. Sa Buhat ikaduhang captitulo, atong mabasa ang pagwale ni Pedro sa adlaw sa Pentecostes. Gibatig kahasol sa konsensya ang mga Hudeong apil sa mga nag-awhag aron ilansang sa krus si Cristo.

Tan-awa; “Sa pagkadungog niini sa mga tawo, natandog sila pag-ayo ug giingnan nila si Pedro ug ubang apostoles, “Mga igsoon unsa may among buhaton?” Unya miingon si Pedro kanila, “Ang tagsa-tagsa kaninyo maghinulsol, ug magpa-bunyang sa ngalan ni Jesu-Cristo aron pasayloon ang inyong mga sala ug madawat ninyo ang gasa sa Dios nga mao ang Espiritu Santo.” (Buhat 2:37-38)

Mao kini ang unang gikinahanglan aron mahimong hipno nga kristiano ang usa ka tawo. Ang pagkadawat sa gasang Espiritu Santo maoy unang timailhan sa usa ka matuod nga kristiano. Niini makalaom siya nga sa pagbalik ni Cristo banhawon siya nga usa ka espirituhanong kinaiya sama sa kinaiya ni Cristo (Filipos 3:20-21).

Paminaw; “Kon ang ang Espiritu Kaniya nga nagbanhaw kang Cristo gikan sa kamatayon nagpuyo kanimo, Siya nga nagbanhaw kang Cristo gikan sa kamatayon mao usab ang magbanhaw sa imong madunotong lawas pinaagi sa Espiritu nga anaa kanimo.” (Roma 8:11)

Ang unang hut-ong sa mga tawo nga mituo ug mingdawat sa pagka-manluluwas ni Cristo; nagma-tinuorong nagsunod sa Iyang mga kasuguan ug nagpabiling masaligon sa Dios hangtud sa ulahing mga gutlo sa ilang kinabuhi - silang tanan makalaom nga banhawon sa pagbalik ni Jesus.

Mao kini gibilin nga mga saad ni Jesus, ug si apostol Pablo saksi niini. Paminawa: “Mga igsoon, buot kami nga masayod kamo sa kamatuoran mahitungod niadtong nangamatay na, aron dili kamo maguol ingon sa mga tawo nga walay paglaom. Kay kita nagtuo man nga si Jesus namatay ug nabanhaw, busa nagtuo kita nga banhawon sa Dios kadtong nangamatay nga nagtuo kang Jesus aron paubanon kaniya.

Ang pagtulon-an nga gikan sa Ginoo mao kini: kita nga buhi pa inigbalik sa Ginoo, dili mag-una niadtong nangamatay na. Unya mabati ang singgit sa pagmando ug tingog sa arkanghel ingon man ang lanog sa trumpeta sa Dios, ug mokunsad ang Ginoo gikan sa langit.

Maoy unang mabanhaw kadtong nangamatay nga nagtuo kang Cristo. Unya kita nga buhi pa niadtong adlaw, bayawon uban kanila didto sa panganod aron pagsugat sa Ginoo. Ug kita uban na kanunay sa Ginoo. Busa pagdinasigay kamo tungod niining paglaoma.” (1 Tesalonica 4:13-18)

Kon ang mga mabanhaw kauban na kanunay sa Ginoo nga magsugod sa adlaw sa iyang pagbalik, asa man silang dapita magpermanente?

Mangadto pa ba sila sa langit human nila sugaton si Cristo nga gikan na sa langit?

Kamong duna'y sugaton nga mga kaigsonan nga nagagikan sa laing dapit, unsa man, mamalik mo sa iyang gigikanan?

Si propetang Zacarias adunay tubag: “Kay moabot ang Ginoo ug siya'y makiggubat sa maong mga nasod sama sa iyang gibuhay sa nangaging panahon. Nianang panahona mobarog Siya sa Bukid sa mga Olibo nga atbang sa Jerusalem dapit sa sidlakan...Ang Ginoo mao nay maghari sa tibuok kalibotan. Niadtong panahona ang iyaha rang ngalan maoy pasidunggan ingon nga Ginoo.” (Zacarias 14:3,9)

Klarong dili mobalik si Cristo sa langit aron pagadalhon ang mga kristianong nangabanhaw na. Adto sila magpahiluna sa Jerusalem. Dili sukwhi sa uban pang gitudlo sa Biblia nga dinhi sa yuta maghari si Jesus ug ang mga kristianong nagmadaugon sa ilang pagsunod sa Dios. Gihatagan kini'g suporta sa Gipadayag 5:9-10: “Kay gipatay ka (si Cristo) ug pinaagi sa Imong kamatayon gitubos mo ang katawhan alang sa Dios, gikan sa tanang banay, pinulongan ug katawhan, ug kanasoran ug gihimo mo silang gingharian sa mga pari aron mag-alagad sa atong Dios; ug MAGHARI sila sa KALIBOTAN.”

Dugang pa; “Nakita ko usab ang mga kalag niadtong gipamunggotan tungod sa pagsangyaw nila sa kamatuoran nga gipadayag ni Jesus, ug tungod sa pulong sa Dios...Nabanhaw sila ug naghari uban kang Cristo sulod sa 1,000 ka tuig. Wala mabanhaw ang ubang mga patay hangtod nga miagi and 1,000 ka tuig. Bulahan kaayo ang nahiapil sa unang pagkabanhaw. Wala nay gahom kanila ang ikaduhang kamatayon. Mahimo silang pari sa Dios ug ni Cristo. Ug maghari sila uban kaniya sulod sa 1,000 ka tuig.” (Gipadayag 20:4-6)

Mao kini ang unang hut'ong sa mga kristianong mabanhaw pag-abot ni Jesus. Kinsa man ang sunod banhawon ug kanusa kini mahitabo?

Ang Ikaduhang Pagabanhawon

Ang ikaduhang pundok nga pagabanhawon usa ka dakong hitabo' nga angayan ipagmaya sa katawhan. Dugay nang panahon nga gitaptapan sa kangitngit ang kinadak-ang bahin sa katawhan sa kinatibuk-ang laraw sa Dios. Hinunooa: “Kay kon wala hisabti ang ebanghelyo nga among giwali, ang wala makasabot niini kadto rang wala mangaluwas.

Dili sila motuo niini tungod kay gibutaan man sa daotang dios niining kalibotana ang ilang mga hunahuna aron dili sila makakita sa kahayag sa Maayong Balita mahitungod sa himaya ni Cristo...” 2 Corinto 4:3-4.

Ang Gipadayag 20:5, may gisaysay kong kinsa ang ikaduhang pundok nga pagabanhawon: “Wala mabanhaw ang UBANG MGA PATAY hangtod nga miagi ang 1,000 ka tuig.”

Atong nakita nga ang unang mabanhaw maghari uban kang Cristo sulod sa 1,000 ka tuig. Apan adunay mga tawo nga mabanhaw lamang pagkatapos na sa 1,000 ka tuig. Mao kini ang kinatibuk-an sa katawhan nga wala masayod, wala makadungog sa nag-inusarang ngalan nga naghatag ug kaluwasan Sila ang kinadak-ang pundok sa katawhan nga wala makaila ug wala modawat sa mga kamatuoran gitudlo ni Cristo sukad pa sa ilang pagkahimugso.

Ang tanan nga wala makadungog ug wala makaila sa nag-inusarang ngalan ubos sa langit nga naghatag ug kaluwasan nga mao si Cristo, (Buhat 4:10-12) dili Niya hikawan ug higayon aron maluwas.

Sukwahi kini sa mga magarbohong nagproklama nga sila lang ang adunay kaluwasan. Hinuon, sa iya-iyang panahon kini mahitabo. May mauna, may ulahi, apan parehong dunay oportunidad sa kaluwasan ang tanan.

Ang tanang nangamatay nga wala maabot sa pagsangyaw sa maayong balita mahitungod sa kaluwasan nga mabatonan pinaagi kang Cristo banhawon. Daghan kaayo kini. Tanang nangamatay gikan kang Adan hangtod sa ikaduhang pagbalik ni Jesus nga wala makaila sa matuod nga Dios ug sa Iyang mga plano banhawon sa estadong pisikal ug tudloan sa plano ug pamaagi sa Dios. Sila usab adunay paglaom ug higayon nga mahimong espirituhanong anak sa Dios. Ubos sa pagdumala sa Dios, ang tibuok katawhan adunay higayon nga maluwas. Wala itudlo sa Biblia ang gipanghambog sa mga relihiyong nagpatootoo nga ang ilang pundok lamang ang dunay kaluwasan. Manggiangayon ang Ginoo. Tanang higayon ihatag kanimo aron makabaton ka'g kaluwasan. Si Pablo miingon: “Maayo kini ug makapahimuot sa Dios nga atong Manluluwas, *nga buot nga maluwas ang tanang tawo ug mahibalo sa kamatuoran.*” (1 Timoteo 2:3-4.) Moabot ang panahon nga ang kamatuoran sa Dios maisangyaw sa tibuok katawhan.

Ikatulong Pagkabanhaw

Ang usa ka masulob-ong yugto sa katawhan mao ang ikatulong grupo nga pagabanhawon. Mao kini ang mga tawo nga hingpit na ang kaalam sa Diosong pamaagi ug panginabuhi. Nakadawat sa gasa sa Espiritu Santo ug nagmatinuoron sa sinugdanan apan wala molahutay sa pagsunod sa Dios.

Gisalikway ang kamatuoran ug gisupak ang mga kasugoan sa Dios.

Wala maghinulsol sa ilang mga sala, busa alang kanila nagaingon ang Dios: “Manimalos gayod ako ug pabayron ko sila” dugang pa niini, “Hukman sa Ginoo ang Iyang katawhan. Makalilisang gayod ang pagkahulog ngadto sa kamot sa buhing Dios.” (Hebreo 10:30-31)

Aduna pay dugang nga makalilisang nga mga pasidaan: “Ang adlaw moabot nga ang tanang mapahitas-on ug daotan sunogon sama sa dagami. Niadtong mga adlaw mangasunog sila ug walay mahabilin kanila. Apan kaninyo nga nagsunod kanako, ang akong gahom sa pagluwas mosubang sama sa adlaw ug mag-ayo sa balatian sama sa bidlisiw sa adlaw.” (Malaquias 4:1-2)

“Unya gitambog ang kamatayon ug ang hades ngadto sa linaw nga kalayo. Kining linaw sa kalayo mao ang ikaduhang kamatayon. Ang tanan kansang ngalan wala mahisulat sa libro sa kinabuhi gitambog ngadto sa linaw nga kalayo.” (Gipadayag 20:14-15)

Hinumdumi kini: “Bulahan kaayo ang nahiapil sa unang pagkabanhaw. Wala nay gahom kanila ang ikaduhang kamatayon” (Gipadayag 20:6)

Pangutana: Unsaon pagpahimatngon sa mga nakasala batok sa Ginoo ilabi na kadtong gitugyanan ug hingpit nga kahibalo sa Iyang pamaagi? Natural lang nga banhawon sila aron ilang makita ang dakong kasaypanan nga ilang nahimo batok sa Dios. Mao kini gisulti ni Jesus: “**kadtong maayog binuhatan mabanhaw ug mabuhi, ug kadtong daotan ug binuhatan mabanhaw aron silotan.**” (Juan 5:29)

Hinaut unta nga ang mga naipahayag niining basahona magdugang sa kalig-on sa inyong pagtuo sa mga gisaad sa buhing Dios.

Ang kamatuoran sa usa ka umaabot ug dili kalikayang mahitabo sa tawo dili angayan kabalak-an tungod kay adunay plano ang Dios nga pagabanhawon ang tanan ug hataga'g higayon nga masayran ang Iyang kinatibuk-ang laraw alang sa katawhan nga Iyang gimugna ug gihigugma.

Ang Dios nga makagagahom nagpamatuod sa ikaduhang pagbalik ni Jesus. (Gipadayag 22:12,20) Busa hinunoa: “Ang Ginoo dili maglangan pagtuman sa iyang gisaad sumala sa gihunahuna sa uban. Apan siya nagpailob kaninyo, kay dili siya buot nga may usa nga malaglag, kondili nga ang tanan maghinulsol ug mobiya sa ilang mga sala.” (2 Pedro 3:9)

Mintras buhi pa kita atong hunahunaon ang mga kamatuorang gihatag sa Dios dinha sa Iyang mga pulong. Si Cristo nangutana sa iyang mga disipulo: Mobiya ba usab kamo kanako? Si Pedro mitubag kaniya, “Ginoo, kinsa may among kapaingnan? Anaa kanimo ang mga pulong nga naghatag ug kinabuhing walay kataposan...” (Juan 6:67-68)